



# EN PE PATRIOTIZM TIA BON

## Prezidan ti donn legzanp an 2008; annou swiv



*En dirizan lopoziyon ki ti met Sesel avan tou*

I annan plizyer sitiasyon ki arive kot tou Seselwa i ganny demande pour demontre en o-nivo patriotizm. I kapab dan moman lazwa ou dan moman kot pei i ganny menase. Seselwa in ralye deryer nou paviyon ler Zwe de Zil ti ganny organize lo nou teritwar. Seselwa ti ralye e siport gouvrenman e nou bann zonm e fanm dan liniform letan pirat ti en menas dan nou delo teritoryal. Personn pa ti get kouler politik ; tou sitwayen ti santi nesessite ini dan lentere nasyon. Sa ti enkli lopoziyon sa lep-ok ki ti ganny dirize par Prezidan Wavel Ramkalawan. Anba direksyon Msye Ramkalawan, lopoziyon ti rekonnent nesessite pou siport gouvrenman dizour pour fer fas avek bann defi nasyon.

Sitiasyon ki Sesel i trouv li ladan sa dernyen lannen i pli serye ki zanmen dan son listwar. Sa pandemi ki pe afekte lemond antye in anmenn bokou defi ekonomik e sosyal. Apre bokou negosiasyon, pei in antre lo en programm avek Fon Moneter Enternasyon (IMF) avek bi pour remet nou lekonomi lo en semen soutenabilite ki pou permet pei rebran lelan progre ekonomik. Anplis ki sa, Sesel i bezwen kontinyen rod fason pour diminyen to lenfeksyon pour kapab kree en lanvironnman an sekirite pour atrakte touris ki pilye nou lekonomi. Plis ki zanmen, Sesel i bezwen tou son zanfan pour sirmont sa bann defi.

I premye fwa ki Sesel i fer fas avek en

pande mi me pa premye fwa ki pei i antre dan en programm avek Fon Moneter Enternasyon (IMF). Premye fwa Sesel ti antre anba en tel programm, Prezidan Ramkalawan ti Lider Lopoziyon e i ti annan lasazes pour ralye son bann siporter pour siport programm gouvrenman akoz i ti konpran nesessite pou fer li. I ti demontre en matirite politik eksepsyonnel e en senserite pou toultan fer sa ki meyer pour Sesel.

Ozordi, plis ki zanmen, i nesesser pour tou Seselwa ralye pou siport sa programm IMF ensi ki siport bann regulasyon ki lotorite lasante in met an plas pour anpes propagasyon viris korona.


Nou prezidan in toultan met Sesel avan tou; in donn legzanp. Annou, nou osi, montre nou matirite e siport gouvrenman dan sa moman kot Sesel i bezwen tou son zanfan.

## LDS i met Seselwa an premye

Lapwentman de Seselwa koman ziz Lakour Siprenm i en lendikasyon byen kler ki gouvrenman LDS i angaze pour met Seselwa an premye. Pour bokou lannen, etranze in okip laplipar bann pozisyon ziz dan Sesel me sitiasyon pe gradyelman sanze. Lotorite Lapwentman Konstitusyonnel in osi konpran nesessite pou lokaliz bann pozisyon dan pei e zot rekomandasyon pour apwent sa de ziz Seselwa in vremen ganny apre-sye par popilasyon.

I annan talan dan Sesel e nouvo gouvrenman pe kontinyen fer son mye pour apwent Seselwa dan bann pozisyon kle e redwir depandans lo etranze. Apre tou; nou bezwen fer Sesel vremen pour tou son zanfan.

# Kovid-19; sitiasyon pe amelyore



**I**n annan en rediksyon signifikan dan la kantite ka lenfeksyon dan pei sa dernyen 2 semenn. Malgre sa, bann restriksyon i reste an plas. Komisyoner Lasante Piblik, Dokter Gedeon, pe demann tou Seselwa pour reste konsyan e pran zot responsabilite personnel pou asire ki to lenfeksyon i kontinyelman desann.

Antretan, tou Seselwa ki pa ancor pran vaksen i ganny ankouraze pou fer li. Vaksen i donn proteksyon e anpes komplikasyon an ka lenfeksyon.

# Ler dokter i vin politisyen: en sel katastrof

**K**i arive ler en dokter i deside vin en politisyen? Pa bezwen nou al lwen pour konpran sa dilenn. Zis get konportman lider US.

Koman en profesyonnel medikal dan en profesyon ki sov lavi, bokou ti ekspekte ki lider US ti ava angaz li avek bann lezot profesyonnel dan Minister Lasante pour donn son sipor e konsey dan sa lalit pou fer fas avek pandemi Kovid-19. Apre tou, son profesyon i egzize ki i pa fer nanryen ki anpes bann profesyonnel medikal fer zot louvraz. Malerezman i fer tou le kontr. Menm



si bann profesyonnel medikal i kontinyelman fer piblik konpran ki gouvènmman pe donn zot tou sipor dan bann rekomandasyon ki zot fer, Dokter Herminie i ensiste ki se lotorite politik ki pe diriz loperasyon medikal dan sa peryod pandemi. Sa latitid i deplorab pour en lider politik e en swadizan profesyonnel lasante. Se selman en lespri limite ki kapab trenn servis lasante en nasyon dan son demagozi politik.

Depi zour in pran latet parti, dokter in demontre en obsesyon avek bann viktim Kovid. Plizyer milyon dimoun in deza mor e plizyer pou mor ancor avek Kovid. Seselwa osi in mor e i annan ancor pou mor. Sa larealite en pandemi. Olye kont dimoun mor pou fer politik avek, i devwar nou tou pou pran aksyon nesese pour minimiz fatalite dan nou pei. Dokter ansarz kot US pa oule konpran sa. I vwar sak lanmor koman en viktwar politik pour son parti- en politik korbo. Tou dernyerman, sa politik in pran en nouvo dimansyon. Zot in komans anmenn Seselwa pou fer gele lo televizyon nasyonal: politik larm e politik soufrans. Sa latitid i degoutan e demontre en mank matirite. I malere ler en dokter pa kapab montre konpasyon pou fanmir ki'n perdi zot pros. Sa kalite politik pe fer nou nasyon perdi son konpa moral.

# Nou bezwen adapte pour Sesel kapab bouz devan

**M**algre ki sanzman politik in arive, bokou Seselwa pa ancor kapab aksepte sa fe. Nouvo gouvènmman i tre okipe avek lenplimantasyon son polisi e delivre lo son promes elektoral tandis ki i annan en pti group ki pa ancor reveye avek larealite. Zot ancor krwar ki se selman zot ti kapab diriz Sesel. Zot pe konplent parrey bann pti baba ki'n perdi zot bibron. Nouvo tim Lopozisyon pa pou zanmen adapte avek letan me sa i zot problemn.

Lamazorite Seselwa in lager dir pour anmenn en sanzman dan sa pei. Finalman zot zefor in ganny rekonpanse par en gouvènmman avek en mazo-



rite absoli. Sertenman zot bezwen fyer zot lakonplisman. Sepandan, sa lafors politik i poz bokou responsabilite lo zepol Prezidan avek son lekip. Gouvènmman LDS in montre ki zot ase saz pour pa servi zot lafors politik an bonavini menm si i annan bokou presyon sorti kot siporter.

Bann dirizan LDS i konsyan e konpran santiman son bann siporter prenan kont ki bokou in ganny viktimize par rezim ki ti la oparavan me LDS in toutan fer konpran ki dan

Sesel napa plas pour vanzans ek laenn. Ozordi LDS i o-pouwar e i annan en loblasyon pour garanti ki okenn Seselwa pa ganny viktimize pour son krwayans politik. Apre tou, tou siporter LDS i bezwen konsyan ki nou nepli dan lopozisyon e nou annan en devwar moral pou siport bann polisi ki nou'n lager bokou lannen pour ganny enplimante. Nou lalit pou perdi tou son sans si zanmen nou perdi direksyon e fer parey gouvènmman oparavan in fer.